

Inersimasunik ilinniartitsisarneq pillugu Namminersornerullutik Oqartussat nalunaarutaat nr. 25, 7. december 2000-imeersumut allannguutissatut siunnersuut, taamaalilluni nalunaarut malillugu §2 imm.1-imi piumasaqaataasup ilinnialerniarluni qinnuteqartussap 30-inik ukioqalereersimanissaata ukiunut 26-inut appartinneqarnissaanik naalakkersuisut sulissuteqaqqullugit peqquneqarnissaannik inatsisartut aalajangiiffigisassaattut siunnersuut.

(ATASSUT sinnerlugu Inatsisartunut ilaasortat ATASSUT: Siverth K. Heilmann, Knud Kristensen)

Akissuteqaat

(Kultureqarnermut, Ilinniartitaanermut, Iisimatusarnermut Ilageeqarnermullu Naalakkersuisoq)

Siullermeerinninneq

Inatsisartunut ilaasortat Siverth K. Heilmann aamma Knud Kristensen Inersimasunik ilinniartitsisarneq pillugu Namminersornerullutik Oqartussat nalunaarutaat nr. 25, 7. december 2000-imeersumut allannguutissatut siunnersuut, taamaalilluni nalunaarut malillugu §2 imm.1-imi piumasaqaataasup ilinnialerniarluni qinnuteqartussap 30-inik ukioqalereersimanissaata ukiunut 26-inut appartinneqarnissaanik naalakkersuisut sulissuteqaqqullugit peqquneqarnissaannik inatsisartut aalajangiiffigisassaattut siunnersuuteqarput.

Naluneqanngitsut innuttaasut amerlanerpaat ilinniagaqarnikkut piginnaasanillu ineriartortitsinikkut piginnaasaqalernissaat siunertaralugu Naalakkersuisut annertuumik suliniuteqarput.

Innuttaasut 30-nik ukioqalereersimasut - inuusunnerunermanni inuussutissarsiutinut ilinniagaqarsimangitsut – inuussutissarsiutinut ilinniakkamik naammassinninnissamut periarfissaqavinnissaat Naalakkersuisunut pingaaruteqarpoq.

Inersimasunik ilinniartitsisarneq pillugu Namminersornerullutik Oqartussat nalunaarutaat nr. 25, 7. december 2000-imeersumut tunuliaqutaasooq tassaavoq innuttaasut ulluinnarni aningaasaqarnikkut pisussaaffillit – pingaartumik innuttaasut pilersuisussaataasut – inuussutissarsiutinut ilinniakkamik naammassisinnaanermut aningaasaqarnikkut taamatupajaarli atugassaqartinneqarnissaat.

Maanna 30-t missaanniittut inersimasutut ilinniartinneqarput.

Inersimasutut ilinniagaqarnissamut piumasaqaataavoq qinnuteqartup inuussutissarsiornikkut attuumassuteqartumik sivikinnerpaamik ukiuni pingasuni misilittagaqarnissaa, imaluunniit inuussutissarsiummik allamik sivikinnerpaamik ukiuni sisamani misilittagaqarnissaa.

Immikkut pissutissaqartillugu ukiussarititaasut suliffittullu piumasaqaatit uniorneqalaarsimatillugit immikkut akuersissuteqartoqarsinnaavoq.

Ukiussarititaasuni inersimasunik ilinniartitsinermut qinnuteqartut 26-leereersimatillutik ulloq naallugu suliffeqarsimasussaapput inersimasunik ilinniartitsinermut ilanngunneqarsinnaassagunik.

Taamaalilluni inuusuttut 17-init 25-nik ukiullit inuussutissarsiutinut ilinniartitaanermut qinnuteqakkajunnerusartut inersimasunik ilinniartitsinermut qinnuteqarsinnaanissaat nalunaarummi pinngitsoorniarneqarpoq.

Oqaatigineqassaaq qinnuteqartartut 17-init 25-inut ukiullit amerlassusaat 17-init 25-inut ukiulinnit qinnuteqartartunit tamarmiusunit procentinngorlugit 78 procentiummata – qinnuteqartut 1083-iullutik.

Siunnersuut ukiussarititaasut 30-nit 26-inut appartinneqarnissaanut tunngammat siunnersuutip akuerineqarnerata kingunerissavaa piffissaq tamakkerlugu suliffeqarnerup inuusulluinnartunit 22-nik ukiulinnit aallartissinnaanissaa. Taamaattumik inuusulluinnartut inersimasutut ilinniartitaanissartik 22-nik ukioqalernerminnit utaqqisinnaavaat taamaalillutillu inuusuttunut ilinniartitaanerni ilinniannitsoorsinnaallutik.

Naalakkersuisut isumaqarput inuusuttut inuussutissarsiutinut ilinniarusuttut sapinngisamik inersimasunik ilinniartitsineq pinnagu inuusuttunut ilinniartitaanernik ilinniartariaqartut.

Oqaatigineqareersutut inersimasunut ilinniartitaanernut qinnuteqartunik pineqartunik naliliinerup kingorna piumasaqaatinut immikkut akuersissuteqarnissaaq inatsimmi periarfissaareerpoq. Taamatut periarfissaqarnikkut qinnuteqartut 30-t inorlugit ukiullit immikkut tunngavissallit pisariaqartitalillu akuerineqarsinnaanerata qularnaarneqarpoq.

Aammattaaq Naalakkersuisut siunnersuuteqartutulli isumaqarput ukiussarititaasunik appaaneq Nunatsinni ilinniarsimasunik amerlisaataanaviannitsoq. Tamatumunnga atatillugu akerlianik Naalakkersuisut isumaqarput siunnersuutip kingunerit inuusuttunik inuusuttunut ilinniartitaanerni ilinniartariaqartunik piumassuseerutsitsinnaasoq.

Naalakkersuisut siunnersuuteqartunut eqqaasitsissutigissavaat inuusuttut amerlanerusut ukiussarititaasut 26-inut appartinneqarnerat tunuliaqutaralugu inersimasunut ilinniartitsinermit aallartitsinnaassappata siunnersuutip akuerineqarnera inuiaqatigiinnut naapertuutinnitsumik akitsorsaataasinnaammat.

Taamaattumik inersimasunik ilinniartitsinermut ukiussarititaasut 30-nit 26-inut apparneqarnissaat pillugu Naalakkersuisut siunnersuuteqartut isumaqatiginngilaat.

Oqaatigineqartut qulaaniittut tunngavigalugit Naalakkersuisut inassutigissavaat aalajangiiffigisassatut siunnersuut akuerineqassanngitsoq.